

**EKSKLUZIVNO** Portparol NATO-a Džejms Apaturaj za „Avaz“

# Razočarani smo što u BiH nema političkog napretka

Novo strateško opredjeljenje snažno podržava širenje Saveza

*(Od specijalnog izvještaja  
„Dnevnog avaza“ iz Lisabona)*

Sjevernoatlantski savez razočaran je što u Bosni i Hercegovini nema političkog napretka koji bi omogućio nastavak približavanja zemlje punopravnom članstvu u NATO-u, izjavio je ekskluzivno za „Dnevni avaz“ portparol Saveza Džejms Apaturaj (James Appathurai) tokom samita šefova država i vlada NATO-a u Lisabonu.

Apaturaj je potvrdio da će novo strateško opredjeljenje Saveza dodatno potvrditi proces proširenja. Istovremeno, dokument se bavi strategijom NATO-a za narednih deset godina ne spominjući zemlje pojedinačno.

- Strateški koncept obuhvata narednih deset godina. Ne fokusira se na pojedinačne izazove država koje su u procesu priključenja. No, potpuno je jasno da bi sve države saveznice htjele vidjeti politički napredak u BiH, posebno kako bi se moglo konačno nastaviti s primjenom Akci-



**Apaturaj: Saveznici žele vidjeti napredak**

onog plana za članstvo (MAP) u NATO-u, koji je odobren još u aprilu ove godine - kaže Apaturaj.

Prema njegovim riječima, jasni su koraci koje BiH mora uraditi kako bi došla do početka primjene MAP-a.

- To zahtijeva donošenje

određenih političkih odluka. Razočaravajuće je, moram reći, što se to još nije dogodilo. NATO je i dalje snažno predan tome da započne s Akcionim planom za članstvo čim uvjeti budu ispunjeni - rekao je Apaturaj. **Tarik LAZOVIĆ**

Bh. delegacija na samitu NATO-a u Lisabonu

# Cikotić: Imamo novu šansu

Radmanović govorio o učešću bh. vojnika u misiji u Afganistanu • Moguće povećanje misije

Novi strateški koncept NATO-a pojačao je namjeru Saveza za proširenjem, što je dodatna šansa za Bosnu i Hercegovinu, izjavio je jučer u Lisabonu za „Dnevni avaz“ Selmo Cikotić, ministar odbrane BiH, nakon što je bh. delegacija učestvovala na skupu u portugalskoj prijestonici.

## Najjača koalicija

Prema njegovim riječima, novi koncept Saveza dodatno će potvrditi priliku za BiH da, kada budu ispunjeni uvjeti, postane punopravna članica. Cikotić ističe da je na dijelu samita posvećenom Afganistanu potvrđena spremnost naše zemlje da učestvuje u operacijama podrške miru.

- O ISAF-u govorilo se kao o najjačoj koaliciji nakon Drugog svjetskog rata i najkompleksnijoj misiji. BiH ima priliku da učestvuje u tom procesu. Mi smo izrazili i spremnost da povećamo i pojačamo naše učešće kroz veći broj instruktora i mentora - rekao je Cikotić.

Kako ističe, plan za tranziciju ISAF-a koji je jučer usvojen znači po-



Sa samita NATO-a: Pojačana namjera Saveza za proširenjem

(Foto: AP)

stepeno i uvjetno prebacivanje odgovornosti na domaće snage sigurnosti, a ne povlačenje iz Afganistana.

Bh. delegaciju u Lisabonu predvodio je predsjedavajući Predsjedništva BiH Nebojša Radmanović,

sudjelujući na dijelu zasjedanja kojem su prisustvovali sve države koje učestvuju u misiji Sjevernoatlantskog saveza u Afganistanu. On je tokom kratkog obraćanja istakao da će naša zemlja ostati stabilan partner u operaciji mira u toj državi.

## Bez sporenja

- Doprinos BiH ISAF misiji je veliki ima li se u vidu da je riječ o maloj zemlji, slabe ekonomske snage. Važno je istaći da se učešće BiH u ISAF misiji konstantno povećava i da to ne izaziva nikakva unutrašnja sporenja - rekao je Radmanović.

T. L.



Cikotić: Izražena spremnost



Radmanović: Stabilni partneri

## Ban Ki-mun želi posjetiti BiH

Predsjedavajući Predsjedništva BiH Nebojša Radmanović razgovarao je jučer u Lisabonu s generalnim sekretarom UN-a Ban Ki-munom (Ki-moon), koji je izrazio želju da zvanično posjeti BiH.

Tokom susreta sa Ban Ki-mu-

nom, koji je održan na margina-ma samita NATO, bilo je riječi o radu BiH u Vijeću sigurnosti UN-a i predstojećim aktivnostima u vezi s predsjedavanjem BiH u ovom tijelu u januaru naredne godine.

Šefovi država i vlada 28 zemalja članica NATO-a

# Poboljšati efikasnost državnih institucija

Šefovi država i vlada 28 zemalja članica NATO-a izrazili su jučer punu podršku evroatlantskim integracijama BiH, ohrabrivši domaće političke lidere da rade zajedno, udvostruče napore na poboljšanju efikasnosti državnih institucija i nastave da provode reforme.

- Pozdravljamo napredak u primjeni reformi u BiH, stalne napore na uništavanju viška naoružanja i municije, doprinos međunarodnoj sigurnosti, uključujući učešće u misiji ISAF-a - navodi se u deklaraciji.

Učesnici NATO samita pozdr-

avili su uspješno provedene izbore u BiH.

- Potvrđujemo odluku ministara inozemnih poslova NATO-a od aprila da pozovu BiH da se pridruži Akcionom planu članstva u NATO (MAP), ovlašćujući Vijeće da prihvati prvi godišnji nacionalni program BiH u okviru MAP-a tek onda kada nepokretna vojna imovina identificirana kao neophodna za buduće svrhe odbrane bude zvanično registrirana kao državna imovina BiH i stavljena na upotrebu Ministarstva odbrane - navodi se u deklaraciji.